



Fasnacht 2012

deggterle mitem neye Koffer isch famos laider isch unsere Storch jetzt arbeitslos

s'fangt scho aa im Alter zwische Vier und Acht
doo wärde n eebe die Koffer uffgmacht
s'isch an dr Zyt, dass alli wisse
wie me duet deele n oder kisse

d'Kinder wisse bald besser wie's lauft
uns hän sie sälli Zyt no s'Bravo kauft
also derf me dodrab nid verschregge
was sich im Koffer duet verstege

uss Holz und Plüsch sin all die Sache
d'Froog isch numme, was me dermit ka mache
d'Mainige sin arg verzooge
drum mien mir dr Dr.Sommer frooge

dr Dr. Sommer ka doo au numme lache
au wenn er's versuecht, isch nid viil z'mache
e Koffer statt sym Heftli isch jetzt doo
drum isch au dr Sommer nimm soo froo

„Uffgläärig“, säll isch hyt e wichtig Thema
fir das hämmer in dr Schuel e super Schema
Biecher, Film und grissenen Sache
wo uns s'Ganze aifacher dien mache

kai miesam painlig Gspreech derhai
vom Härz fällt uns e grosse Stai
jetzt mien d'Leerer das halt mache
deene vergoot derby no s'Lache

isch's e Frichtekorb und drin Meloone
oder sin's ebbe gääli, suuri Zitroone
sin am Ändi ebbe doch Banaane
mit em Schiffli koo, doo aane ?

isch's vom Kiosk e Wundergugge
oder e Dääfi wo me nid deerf schlugge
was verbirgt sich wirgglig drinn
isch's fire Gaist oder die divärse Sinn ?

nai, s'isch e n Uffgläärigskoffer fir in d'Schuel
d'Eltere rysst's gwiss scho jetzt vom Stuel
wo fiert das Ganze n äggscht no aane
do ässi y gwiss lieber e gääli Banaane

e Leesig doo derfir sin Fricht aber nid
s'kemme n anderer Sache n im Koffer mit
so viil mir wisse, isch's no inträsant
was dr Leerer het, so in dr Hand

är waiss sälber noonig, wie n är's sell mache
ganz fyyn viillycht, oder luut dass es duet grache
är hofft uff Hilff ussem Groosse Root
muess aber no e weenig warte, und kunnt in Noot

y wär au gärn wiider zwische Vier und Acht
wenn me in dr Schuel soone Koffer uffmacht
y däät dr Leerer ganz viil frooge
und mit deene Frooge richtig plooge

Jää, Herr Leerer... und soo wyyter
ui ui ui, das wurd denn schytter

s'wär wirgglig e riisegroosse Spass
au wenn mir dr Leerer zaigt sy Hass
s'wär spannend und gwiss au doll
und my Kopf dernoo mit Wisse voll

y waiss dernoo genau wie's goot
vom „uff d'Wält koo“ und bis är stoot
dr Storch druffaabe n im Ruhestand
fliegt in Rued iber's ganze Land.

jänu - d'Zyt kamme nid zrugge due
derwääge loose nur Kinder vo hytte zue
drum bloos du mir in d'Schueh
und loss mi mit dem Koffer joo in Rued
dä blyybt jetzt nämlich fir e Zytli zue

luege ob me ihn emool ysetze duet
das brucht denn fir alli rächte Muet
d'Leerer und Schieler findes gwiss doll
oder hän gschwind d'Nase vo dem voll

mir Sprysse wärde noo mol jung an dr Fasnacht
mir sin denn wiider zwische Vier und ca Acht
gumpe n uffem Waage n umme
gänn Dääfi usse de Graade und Grumme
Räppli fliege denn dur d'Luft
und d'Blueme gänn e feyne Duft
jää, das isch Fasnacht unter Sprysse-Frinde
so n e Frindschaft willsch gwiss nie kinde
alt und jung, alli uff aim Waage
doo muess me nimm mee derzue saage
d'Sprysse sin allewyl aimoolig
doodervoo git's kai Wiiderhoolig

e scheeni Fasnacht

D Ladäärne-Uusstellig isch wie allewyl uff em Minschterplatz,
d Wääge und Requisite ka me bi dr Kasärne go aaluege.